


Seyi | Falwasch



SEYIL FALUWASCH

Ighiwe nge waa sserágh schagh taayeer Refaluwasch.

Re yááyá waa igha rebwe 16 leeset. E weewe schagh re 16 lugh, ttow iigh me ngere rebwe sussubw woong. Reel sussubwul woong nge aa ghal voor falúw ye re ghal subwuriir meiye.

Refaluwasch re bwal sesserágheló wóól akkááw falúw bwe rebwe bweibwogh milikka ese ghal voor mewóól falaweer.

Sibwe ira mwey kkewe e 16 nge sów sserágh re fasúl tottoori falúw kka llól Marianas bwe rebwe bweibwogh suubwa. Eyoor eew tittillap ye e bwal aweeweey bwe Marianas nge aar produkto suubwa e ghi ghatch. Ese bwal dibwaddi suubwa kkaal igha re ghal bwughi bwe re bwal bweibwogphoto bwiil me ngere téér bwe rebwe liwiliil ngáli. Aweey selaapi kka si yááyá tempo kkeey ngere sibwe akkamé meta llól tenda.

Waa nge bwal malaweer Refaluwasch. Refaluwasch ngere sibwe aweeweey falúw kka re sápeto meiye nge e ghi schaapaap. Reer Englís nge re ghal ira Low Islands. Iwe, Low Islands nge malamal e ghi mwetemwet ebwe feereey.


Mwey we Espeiyool raa lo fáleey nge eew gurupuur Refaluwasch re seito wóól waa sserágh. Gurupuur Refaluwasch kkaal nge re súúsángi falúw we falaweer igha e ffeireló alangal mwungool reel malamal. Ese bwal mmwel schagh rebwe ffót mwungo llól bwéél bwe sáát aa ghulaalong. Iwe waa taayeer Refaluwasch igha rebwe tooto fáleey.

Ngere eyoor samwooluur Refaluwasch ye e máá nge bwal

waa schagh re yáyá bwe rebwe umwuumw wóól igha rebwe 16 libwáli wóól falúw ghitighiit ye esóór aramasal. Mille schóól ighiwe re fééri tap yeel bweigha essóbw voor le ebwe bwuu fetál wóól peiyal. Máli iyeel bwúlúl aal libwálibwitiw samwooluur Refaluwasch we wóól Ghalaghaal.

Schóókka re fféér waa nge re bwúlúuw aar akkabwung igha schagh re schiwel yáát. Sibwe ira atte mwáál kka raa ghula fisuuw ráagh mwettá. Tappal aar akkabwung nge re amwuri schagh schóól falawa e faisúl aar kke falafal. Eyoor igha re bwal tepengiir sameer reel angaang yeel. Re tóttómwógheló atte kkaal nge emmwel rebwele bwal falafal nge schóókka kkewe mesteruur re pwalló schagh bwelle mille rese weleeti nge iir rebwe afalaar. E bwal voor schóókka re akkabwung reer tuufáy kkewe biyoor. Mwáál ye e ghi mwuschál akkabwung nge ebwele aiyeghiir malakka re ghukkule bwe rebwe abwúngú. Schóól falawa ngere e maaghúf aa faffay scheeleer reel falafal. Emmwel ebwe bwal ghulaar ráagh. Saabw fféérúl schagh waa re akkabwung bwe re bwal akkabwung bwaay, meta tappal mwungo kka ese mmwel rebwe angi me meta piliir. Alangeer mwáál kka re palúw nge re ghukkule fféérúl waa, nge ikka saabw palúw nge akkááscháy meleyir re ghukkule.

Iwe ngere rebwele bwulúuw aar fféér waa nge re bwal abwúngúbwúng fengál wóór ebwe faisúl tómwóghol waa ye rebwe fééri. Ngere ebwe waa sserágh fitoow aramas emmwel ebwe kkaaraghááli, pat meta waa yeel rebwe yááya ngáli. Ngere raa takk nge rebwele amwuril bwóbwul mááy kkewe eyoor bwe rebwe fili mille e ghatch bwe rebwe fala bwe waa. Sibwe ira bwóbwul mááy kka e ghatch nge ikka e welewel, esóór malúl me milikka aa ghi maaw. Iwe schóól falafal rebwele



falaátiw bwóbwul we bwe iyeel schééschéél saghúrúl waa.

Llapal aramas kka re tepengi schóól falawa nge e bwal
dipendi ngere ebwe tómwógh waa ye rebwe fééri. Waa kka e
maas ghikkitaló reel féériyeer Refaluwasch nge e ghal
eschay ngere ruschay aramas kka emmwel rebwe atakkaaló
llól ruwoow maram. E bwal ssogholó waa ghikkit me mmwal
waa tóttómwógh kka e kke asserágh. Bweigha eew iye e
mescherágh fféérúl féera reer malakka raa ghukkule nge bwal
reer aramas kkewe re ppung llól aar akkabwungul fféérúl waa

töttómwógh waa sserágh. Waa sserágh, nge e ghal ghula eew pat essóbw ráágh bwe ebwe takk. Iwe máli emmwel sibwe ira bwe mwey we e ló nge alangeer Refaluwasch nge re ghuleey fféérúl waa inaamwo ese weey aar fféér me schóó kkewe raa ghi angaghatch.


Malakka raa ghi mwoot llóol falafalal waa nge palúw. Waa kkaal igha re ghal féérú nge e bwal sóbwósóbw. Paap ye re sóbweey ngáli bwe mmwal waa ngere mwiir nge re ghal ira bwe patch. Meschel waa kkaal nge re bwal aweey ngáli aschepel asaf. Patch ye si kke aweeweey nge re bwal falaawow mereel mááy. Re bwal ayoora ngaat meschel patch me waa bwelle rebwe ghéélú fengálliy. Mille Refaluwasch re yááyá bwe rebwe ghalaghóólaay aschuuschuul paap me leesóbw nge appaschal mááy.

Ireiral waa sserágh nge taam, waa amara, ayú, úrá schóóbwut, epiyep, sálil mwéél, sáliisóbw me alap, foo, ammat me fatúl. Sáál kka wóól waa ikka re yááyá reel sáliisóbw, sálil mwéél me alap nge e féérúl faluwasch schagh Peíráágh kka akkááw nge re bwal yááyá schagh walawal we re ghal fala bwe waa. Taam nge eweey uluulul bwal waa nge e loowow peigh mwáál. Tómwóghol re apéew sángi lughalapal waa. Úrá kka rufósch ikka e mwetewow mellóol waa nge ghiyó. Ghiyó kkaal mille sibwe ira e amwuschú fengálliy waa me taam. E bwal lo wóól yaamw kka ruwoow ikka e fótófótólong llóol taam. E bwal yoor úrá ye e itiló wóól meschel ghiyó kka rufósch. Re ghal ira wááliyáng. Úrá yeel e ghééghéétiw wóól ghiyó lóffóschetiw wóól taam. Refaluwasch re bwal faffaifay faasch ighiwe bwe rebwe yááyá bwe amara. Igha aa yoor canvas nge re saa kke faifaylo faasch. Canvas igha re ghommwal yááyá nge re schuungi bwe e ghatcheló schagh me

mmwal amara kkewe re faiwow mereel faasch. Eew ghatchúl iye ese tchów ngere e tchogh nge inaamwo igha e bwal punguschow. Amara faasch nge Refaluwasch re airúútiw ngere aa punguschow bwe ete ghi tchogholó. Ngere canvas nge llóol malamal schagh mille re airúútiw.

Ayú nge e lo llóol fótófót yeel nge ital 16óbwu ye e lo lughalapal waa. E amwúschúútá amara me schúúschú mwáál. Tolol ye e lo meschel ayú meweiláng nge e kkáng me re bwal ngateli bwe sálil úrúúr ebwe mmwelil tililong llóol. Sáál yeel mille e kke taitá amara. Ngere rebwe soreey waa sserágh kkaal nge úrá mwáál yeel schagh mille re bwughiiló mwiir llóol eew s6óol ffót bwe rebwele bwal féérú bwe mmwal waa.


Refaluwasch re bwal kke ayúuw uut bwe imwal waarr bwe ebwe mwól sângi álet. Llóol uut yeel nge ighaal igha mwáál re sów féérú aar angaang. Sibwe ira, ngere fféérúl alóól, uu me peiráághiir. Alangal ráágh nge llóol uut yeel schagh mille re kke amwala ffeiril waa sserágh kkaal, me waa ghikkit kkaa aghal bweiló. Bwal ighaal schagh igha re ghal itto atakkaaló aar féérú waa kka re faffala. Schóóbwut re bwal ghal itto



llóol uut yeel ngere eyoor yéélágh me ngere re ghal bweibwogphoto mwungo bwe ilitiir mwáál. Olighát nge re itto ukkur fetál llóol me lúghúl uut, me ngere rebwele mwóótol asseling aar tittillap tuufey. Llóol uut yeel nge aliyal re

kke mayúr iye. Waa kkaal ngere ese lo llóól uut bwe iye ngere re fféétágheli schagh llóól sáát nge Refaluwasch re bwálúúw ngáli pálú bwe ete tilingágheló reel álet.


Ngere rebwele bwughiiwow waa sserágh llóól sáát nge re yááyá úrá apputey bwe rebwe atógholuuwow wóól. Eyoor aramas kka raa ghal bwughi úrá kka e ghal lóffóscheló mwiir bwe rebwe le bwal ló isáli mmwal waa mefaal. Igha Refaluwasch raa ghal takkal féérú waar nge raa bwal ghal bwughiiwow leeset bwe rebwele tatta fetál. Reer Refaluwasch nge re bwughiiwow bwe rebwe ló afeifeiyiiló. E bwal weewe meiye ngere raa takkal akkayú uut. Schóóbwut rebwele fféér mwungo bwe sefááliir schóó kkewe me ló afeifeiyi waa rebwe ilitiir.




Fféérúl waa nge e bwal ssogh kkapasal me aitiitil mereer Refaluwasch. Iit kkaal nge falawa re sów yááyá iye ngere re kke aweewe me ngere re kke kkapasal waa. Schóókka re kke akkabwung fféérúl waa nge re bwal akkabwung iit kkaal igha re ghal féérú angaang yeel. Schóól falawa raa ghal afala schóókka re kke akkabwung ifa ireiral waa ye rebwe féérú ngere schúúschú mwáál, taam, me ngere mesap.

Ikkaal akkáaw ital ireiral waa:


1. Leekkeyángil mesal waa - Llóól diinga kka e lo meschel waa.
2. Mwóngoresch - úrá kka e ittá dingaaló me meschel waa.
3. Sóól ffóót - Fótófót - Gheleghel kka ruwow ikka e lo mmwal me mwiir wóól waa. Ighaal igha schúúschú mwáál e fótófótolong llóól.
4. Mesap - Paap ye e lo ruwapeighil waa iye e itiló bwe atippal lóó.
5. Paraf - úrá aitchigh kka e itiló wóól ghiyó kka ruwow wolopeighil waa, iye bwete ebwe weey pôó.
6. Leeparasal waa - Faal mesap mepeigh ye paraf e lo iye.
7. Úrúúr - ngaat ye e lo meschel ayú.
8. Sálil úrúúr - Sáál ye re ghal attilong llóól úrúúr.
9. Tolol - meschel ayú.
10. Leefolap - eliyel iigh llóól waa fáál ghiyó.
11. Leefo - Llóól waa




Sile




1. Eschal Sile
2. Sile
3. Bwulul Waa




- | | |
|---------------|-------------------|
| 1. Lóngol úú | 5. Paraf |
| 2. Féélakk | 6. Epiyep |
| 3. Mesal fāng | 7. Taam |
| 4. Leesóbw | 8. Leeparasal waa |




- | | |
|------------------------------|----------------|
| 1. Amara | 5. Sáliisóbw |
| 2. Ayú | 6. Sáli mweel |
| 3. Úrá (schúúschú) mwáái | 7. Payúl fatúl |
| 4. Úrá (schúúschú) Schóóbwut | 8. Alap |






Wolasché - Woleáí

- | | |
|----------------------------------|----------------|
| 1. Alap - <i>Xangáloq Woleáí</i> | 5. Ghiyó |
| 2. Paraf | 6. Waisché |
| 3. Waaliyáng | 7. Sóosóól waa |
| 4. Yaamw | 8. Taam |





1. Úrá mwaál
2. Sáliisóbw
3. Úrá schoóbwut
4. Fataí
5. Mwóngoresch
6. Ammat

